

Firma iz Živinice zaposluje još 100 radnica

Izvor: poslovne novine

Nakon dvije godine uspješnog poslovanja i rasta na području Grada Živinice firma „BH Fish” proširuje kapacitete i otvara nova radna mjesta.

Firma koja se bavi filetiranjem i preradom inćuna i zapošljava 120 žena zbog proširenja kapaciteta do kraja 2020. godine zaposluje još 100 novih radnica.



Istaknuto je kako se u fabrici ne može proizvesti onoliko koliko se može izvoziti i prodati, a proizvodi se isporučuju velikim trgovačkim lancima u Francuskoj, Njemačkoj, Španiji te ostalim zemljama Zapadne Evrope.

Uposlenice fabrike „BH FISH” ističu zadovoljstvo kada su u pitanju uslovi i način rada same fabrike, te zadovoljstvo zbog pogodnosti koje im ona pruža poput redovne isplate, godišnjeg odmora, bolovanja, te korektnog radnog vremena.

Radna mjesta za žene

Gradonačelnik Kamenjaković istakao je posebno zadovoljstvo zbog poslovanja ove fabrike na području Grada Živinice, zbog mogućnosti zapošljavanja žena čime ovaj grad postaje primjer zalaganja za ravnopravnost i položaj žena u društvu.

“Prije dvije godine smo uspjeli sa direktorom fabrike „BH FISH“ stupiti u kontakt i pomoći mu da otvori ovu firmu u Gradu Živinice. Posebno me raduje činjenica da trenutno u ovoj firmi radi 120 žena, a uspjeli smo dobiti i novu informaciju da će se do kraja ove godine zaposliti najmanje još 100 žena. Imamo mogućnost da obezbijedimo još radnih mjesta za naše sugrađanke i drago mi je da imamo i ovakvu vrstu proizvodnje u Gradu Živinice koja ima perspektivu uspjeha i u budućnosti. Finalni proizvodi su najvažniji i povećanjem finalnog proizvoda, povećava se i vrijednost rada na veći nivo, a samim tim i veća plata našim sugrađankama koje rade u ovoj firmi .”, kazao je Kamenjaković.

Zadovoljan radnicima

Pozitivan utisak koji su na njega ostavili ljudi iz Živinica dok su radili u tvornicama u Hrvatskoj uticali su na to da ovdje otvore firmu, kazao je **direktor firme BH Fish Jon Olasagasti Goya**.

“Ovi poslovi su specifični gdje je potrebna efektivna i kvalitetna radna snaga, koja je nama falila, a na ovom području ima dosta ženske radne snage koja je nezaposlena. Vidio sam da su žene zaista vrijedne i prezadovoljan sam poslovanjem ovdje. Cilj nam je ostati i imati sigurniju budućnost na ovim prostorima, a ne da se zadržimo samo godinu dana ili dvije i onda da odemo. Planirali smo i preseliti poslove koje imamo u Albaniji i drugim tvornicama ovdje, ali idemo korak po korak. Zadovoljni smo i Gradom Živinice, i gradonačelnikom, dozvolama za rad i papirima, ali i radnom snagom. Trenutno imamo zaposlenih oko 120, ali moramo zbog naše proizvodnje uposliti još najmanje 100 žena do kraja ove godine, jer da bi prebacili poslovanje iz Albanije ovdje, treba nam i veći broj uposlenih. Posao koji trenutno radimo i koliko izvozimo tek je 10% od svega što radimo, i godišnje izvozimo oko 150 hiljada kilograma inćuna, a povećanjem broja uposlenika, povećat će se i proizvodnja.”, rekao je on.